

- प्रधानमंत्री नरेन्द्र मोदी काल आकाशवाणी ऊं प्रसारित कर्या जावण वाळा खास कार्यक्रम 'मन की बात' मांय विचार बतावेला।
- उपराष्ट्रपति जगदीप धनखड कह्यो— विकसित भारत रो सपनो सांचो करण सारू महिलावां ने भणावण अर मजबूत बणावण री जरूरत।
- प्रदेश मांय आज राष्ट्रीय लोक अदालतां लगायी ज्यी।
- प्रदेश रा लंकाऊ हलकां मांय केई ठौड़ां चोखो मेह बरस्सो।

000

प्रधानमंत्री नरेन्द्र मोदी काल संवारे 11 बज्यां आकाशवाणी ऊं प्रसारित कर्या जावण वाळा खास कार्यक्रम 'मन की बात' मांय विचार बतावेला। आ हर महीना प्रसारित व्हेवण वाळा ई कार्यक्रम री 114वीं कडी व्हेला। ओ कार्यक्रम आकाशवाणी अर दूरदर्शन रा पूरा नेटवर्क, आकाशवाणी समाचार री वेबसाइट अर न्यूज ऑन. ए.आई.आर. मोबाइल एप माथे ई प्रसारित कर्यो जावेला। ई रे अलावा आकाशवाणी समाचार, दूरदर्शन समाचार, प्रधानमंत्री कार्यालय अर सूचना तथा प्रसारण मंत्रालय रा यूट्यूब चैनलां माथे ई मन की बात कार्यक्रम रो प्रसारण कर्यो जावेला।

000

राष्ट्रपति द्रौपदी मुर्मू कह्यो के सच मांय घणी ताकत व्हे है अर कानूनी बिरादरी इण ने और मजबूत बणावे है। वे आज हैदराबाद मांय नलसर विश्वविद्यालय रा 21वां दीक्षांत समारोह मांय बोल रही ही। राष्ट्रपति समाज रा नीचला पायदान माथे गुजर-बसर कर रह्या लोगां ने सामाजिक न्याय दिरावण सारू काम करण री जरूरत बतायी।

0000

उपराष्ट्रपति जगदीप धनखड आज जयपुर री एक गैर-सरकारी यूनिवर्सिटी मांय टाबरियां सागे 'विकसित भारत 2047 में महिलाओं और शिक्षा की भूमिका' मुद्दा माथे चर्चा कीनी। उपराष्ट्रपति कह्यो के भारत ने विकसित देश बणावण सारू महिलावां री भणाई-लिखाई अर वां मजबूत बणावणो घणो जरूरी है। महिलावां री भणाई लिखाई माथे जोर देता थकां वे कह्यो के वैदिक जमाना मांय ई महिलावां भणाई-लिखाई करती ही। उपराष्ट्रपति कह्यो के मौजूदा दौर मांय महिलावां कानून बणावण समेत संसदीय कामकाज मांय ई भागीदारी कर रही है।

000

प्रधानमंत्री नरेन्द्र मोदी री अगुवाई वाळी केन्द्र सरकार रा तीजा कार्यकाल रा पहला एक सौ दिन मांय करी ज्या खास कामां री जाणकारी देवण सारू आकाशवाणी जयपुर रा प्रादेशिक समाचार बुलेटिनां मांय खास शृंखला चलायी ज्यी है।

000

राज्य मांय आज न्यारी-न्यारी ठौड़ां राष्ट्रीय लोक अदालतां लगायी ज्यी। ई साल री तीजी लोक अदालत मांय राजीनामा रे ज़रिये मोटी तादाद मांय मामला निपटायी ज्या। हाईकोर्ट री जोधपुर अर जयपुर पीठ समेत प्रदेश री सगळी नीचली अदालतां, राजस्व अदालतां, उपभोक्ता मंचां अर प्रशासनिक अधिकरणां मांय लोक अदालतां लगायी ज्यी। उदयपुर मांय चेक अनादरण, पारिवारिक मामला अर वाहन दुर्घटना समेत न्यारा-न्यारा मामला राजीनामा ऊं निपटायी ज्या। दौसा जिला मांय लोक अदालत री 12 बेंचां बणायी ज्यी। आं मांय 3 हजार 462 मामलां रो राजीनामा ऊं निपटारो करता थकां 13 करोड 87 लाख रुपया ऊं बत्ती रकम रा सैटलमेण्ट करी ज्या। सवाईमाधोपुर जिला मांय बणायी

ज्यी 10 बेंचां रे मार्फत राजीनामा ऊं न्यारा—न्यारा मामला निपटायी ज्या अर अवार्ड पास करी ज्या।

000

पाली रा अदालत परिसर मांय अभिभाषक मंडल कानी ऊं नुवी बणायी ज्यी ई—लाइब्रेरी ने सुप्रीम कोर्ट रा जज न्यायमूर्ति पंकज मिथल आज जनता ने सूंपी। ई मौके वे अदालत परिसर मांय पौधा ई रोप्या।

000

प्रदेश मांय वोटर लिस्टां मांय नाम जुडवावण अर बदली करावण समेत न्यारा—न्यारा काम चाल रह्या है अर बूथ लेवल ऑफिसर (बीएलओ) घर—घर जा र सर्वे रो काम पूरो कर लीनो है। मुख्य निर्वाचन अधिकारी नवीन महाजन आ जाणकारी दीनी। वे बतायो के राज्य मांय पांच लाख चौतीस हजार मतदातावां रो सत्यापन कर लियो ज्यो है।

महाजन बतायो के वोटर लिस्टां मांय नाम जुडवावण सारू प्रदेश भर मांय 7 लाख इक्कीस हजार ऊं बत्ती अर्जियां मिली है। सब ऊं बत्ती अर्जिया जयपुर अर जोधपुर जिलां मांय मिली है। वे बतायो के मतदाता सूचियां मांय बदलाव सारू मिली अर्जियां रा निपटारा मांय दौसा जिलो अव्वल है। मुख्य निर्वाचन अधिकारी बतायो के 1 लाख 10 हजार 854 मतदाता दूजी ठौड़ नाम मण्डाया है। महाजन बतायो के 1 जनवरी, 2025 ने 18 साल री उम्र पूरी करण वाळा बी.एल.ओ ऊं मिल र या वोटर हेल्पलाइन (वीएचए) एप रे मार्फत वोटर लिस्ट मांय नाम मण्डावण सारू अर्जी दे सके है। ई बीचे वोटर लिस्टां मांय नाम मंडायोड़ा 100 साल या बत्ती उम्र रा मतदातावां रो अन्तराष्ट्रीय वृद्धजन दिवस रे मौके 1 अक्टूबर ने निर्वाचन विभाग री ओर ऊं मान कर्यो जावेला।

000

स्वच्छता ही सेवा अभियान रा तैत प्रदेश मांय आज ई न्यारा—न्यारा कार्यक्रम राख्यी ज्या। राजसमंद मांय जिला कलेक्टर बाल मुकुंद असावा “माय आफिस क्लीन ऑफिस” अभियान चलायो। ई रा तैत आज छुट्टी रा दिन ई न्यारा—न्यारा सरकारी दफतरां मांय “माय आफिस क्लीन ऑफिस” अभियान सारू करी ज्यी। कलेक्टर रा दफतर रा बगीचा मांय जिला कलेक्टर बाल मुकुंद असावा समेत न्यारा—न्यारा अहलकार सफाई कीनी। अजमेर मांय ई जिला कलेक्टर रा दफतर मांय जिला कलेक्टर अर एस.पी. समेत न्यारा—न्यारा अहलकार श्रमदान कीनो। डूंगरपुर जिला मांय ई जिला परिषद, पंचायत समितियां अर ग्राम पंचायत रा दफतरां मांय सफाई अभियान चलायी ज्यो। जालोर मांय जिला कलेक्टर डॉ. प्रदीप के. गवांडे न्यारा—न्यारा हलकां रो दौर कर र सफाई ऊं जुड्या काम—काज रो जायजो लीनो अर ज़रूरी हुकम दीना।

000

राष्ट्रीय पोषण माह रा तैत आज पाली जिला रा बांता गांव री आंगनबाड़ी मांय पोषक तत्वां री रंगोली सजायी ज्यी। रंगोली रे जरिये आस वाळी अर दूध पावण वाळी महिलावां, किशोरियां अर टाबरियां अर सात साल ताई रा बच्चां ने पोषण रा बारा मांय जाणकारी दीरीजी।

000

केंद्रीय मत्स्य पालन, पशुपालन अर डेयरी मंत्री राजीव रंजन कह्यो के पौधा रोपण ऊं जलवायु मांय बदलाव रा गलत असर रो सामो करण मांय मदद मिलेला। वे आज नई दिल्ली मांय एक पेड़ मां के नाम अभियान रा तैत पौधा रोपण रा अभियान मांय सिरकत कीनी। वे जनता ऊं बत्ता ऊं बत्ता पौधा रोपण री अरज कीनी। मत्स्य पालन, पशुपालन अर डेयरी राज्य मंत्री जॉर्ज कुरियन ई ई मौके पौधा रोप्या।

सूचना प्रसारण अर संसदीय कार्य राज्य मंत्री डॉ. एल. मुरुगन ई आज चेन्नई मांय एक पेड़ मां के नाम अभियान मांय सिरकत कीनी।

000

प्रदेश मांय आज न्यारी-न्यारी ठौड़ां विज्ञान मेळा लगायी ज्या। डूंगरपुर जिला मांय सीमलवाड़ा री स्वामी विवेकानंद राजकीय मॉडल स्कूल मांय मॉडल स्कूलां रो राज्य स्तर रो विज्ञान मेळो लगायी ज्यो। मेळा मांय प्रश्नोत्तरी अर मॉडल बणावण री होड़ां मांय प्रदेश री मॉडल स्कूलां री सिरकत कीनी। सवाईमाधोपुर जिला रा खंडार री राजकीय बालिका सीनियर सेकेण्डरी स्कूल मांय लगायी ज्या विज्ञान मेळा मांय टाबरियां स्वास्थ्य, शरीर, पर्यावरण, अंतरिक्ष अर सौरमंडल समेत न्यारा-न्यारा मुद्दां माथे मॉडल अर चार्ट रो दरसाव कीनो। बाड़मेर जिला रा डिंडावा री सरकारी स्कूल मांय विज्ञान मेळा रा तैत विद्यार्थी भांत-भांत रा मॉडल रो दरसाव कीनो। सलूंबर जिला मांय सेमारी री महात्मा गांधी सरकारी स्कूल मांय लगायी ज्या विज्ञान मेळा मांय विद्यार्थी प्रश्नोत्तरी, विज्ञान मॉडल प्रदर्शनी अर पोस्टर बणावण री होड़ां मांय सिरकत कीनी।

000

शहीद-ए-आजम भगत सिंह री जयंती रे मौके आज वां ने सिरधा भाव सागे याद कर्या जा रह्या है। प्रधानमंत्री नरेन्द्र मोदी सोशल मीडिया पोस्ट रे जरिये भगत सिंह ने नमन करता थकां कह्यो के वे ऐड़ा अमर स्वतंत्रता सेनानी है, जो मायड़ भूमि रा मान री हिफाजत सारू प्राण निछावर कर दीना। मुख्यमंत्री भजनलाल शर्मा ई भगत सिंह ने याद करता थकां कह्यो के भगत सिंह देश रा नौजवानां मांय वां बगत देशप्रेम री अलख जगायी। ई मौके हनुमानगढ़ टाउन रा राजकीय नेहरू मेमोरियल कॉलेज मांय खास कार्यक्रम राख्यी ज्यो।

000

प्रदेश रा लंकाऊ हलका मांय आज केई ठौड़ां मेह बरस्यो। सलूंबर, जयसमंद अर सराड़ा हलका मांय चोखी बिरखा व्ही। उदयपुर मांय आज ई मेह बरस्यो। सवाईमाधोपुर जिला मांय ई छांटो-छिड़को व्हेवण ऊं गर्मी ऊं साता मिली। बांसवाड़ा जिला मांय लगातार 2 दिन ऊं व्हे रही बिरखा रे कारण नदी-तळावां मांय खूब पाणी आ रह्यो है। ई बीचे कोटा बैराज रा दो दरुजा खोल र 7 हजार 552 क्यूसेक पाणी निकाळ्यो जा रह्यो है। दूजी कानी चित्तौड़गढ़ जिला मांय निम्बाहेड़ा कने चरलिया ब्राह्मण गांव मांय कदमाली नदी मांय नहावण सारू गया दो बच्चा बह गया, ज्यां री तलाश करी जा रही है। झालावाड जिला मांय रुक-रुक र बिरखा व्ही। बिरखा रे कारण साखां ने नुकसान री शंका ने ध्यान राखता थकां किसान जिला कलेक्टर ने पानड़ी सूप र खराबा रो सर्वे करावण री मांग कीनी है।

000

विश्व रेबीज दिवस रा सिलसिला मांय आज कोटपूतली-बहरोड़ रा जयसिंहपुरा मांय पशुपालन विभाग अर चिकित्सा विभाग री ओर ऊं जागरूकता कार्यक्रम राख्यी ज्यो। कार्यक्रम मांय पालतू जिनावरां रे रेबीज ऊं बचाव रा टीका जरूर लगावण री राय दीरीजी अर रेबीज री बीमारी रा लक्षण अर ईलाज री जाणकारी दीरीजी। सवाईमाधोपुर जिला मांय आलनपुर रा ढांढां रा सरकारी अस्पताल मांय पालतू अर आवरा कुत्तां अर पालतू बिल्लियां रे टीका लगायी ज्या अर जनता ने रेबीज री बीमारी ऊं बचाव रा बारा मांय जरूरी जाणकारियां दीरीजी। केकड़ी रा पशु चिकित्सालय परिसर मांय मुफ्त रेबीज टीकाकरण शिविर लगायी ज्यो। शिविर मांय 45 जिनावरां रे टीका लगायी ज्या।

000